



Da la suprastanza cumünela

Plazza administraziun cumünela 60 – 100%

Zieva avoir fat ün' analisa detagliada s'ho resulto cha l'administraziun drouva üna impiegheda / ün impigheo dapü. Impustüt per sgürer las uras d'avertüra e scha qualchün crudess oura esa necessari d'avair üna rimplazzanta u ün rimplazzant. Zieva avoir scrit oura la piazza cun data finela dals 31 schner 2018, sun gnidas inoltredas diversas annunzchas. Seguond la descripziun da la piazza offrida sun gnidas duos annunzchas in dumanda. Il chanzlist ho invido las personas per fer ün discuors persunel. Il chanzlist fo cotres la dumanda da tscherner a Moreno Raselli scu nouv collavuraint da l'administraziun cumünel da S-chanf cun ün pensum da 100%. La suprastanza cumünela decida unanim da tscherner a Moreno Raselli scu nouv collavuratur illa administraziun cumünela da S-chanf.

Recuors taxas per giasts e promover il turissem

La vschinauncha da S-chanf ho al principi da l'an tramiss a mincha proprietari da chesa cun abitaziuns da vacanzas u personas chi daun a fit lur abitaziun ün quint per la taxa per giasts e per promover il turissem. Sün que sun inoltro diversas reclamaziuns da personas chi sun da l'avis cha'l quint nu saja güstificho. La suprastanza cumünela ho tratto e decis mincha cas singul illa tschanteda dals 07 marz 2018. Las personas pertuchedas haun survgnieu üna risposta da la suprastanza cumünela.

Lavuors proget Chapella-Tulait

Zieva avoir scrit oura la prüma vouta las lavuors per il proget Chapella-Tulait ho la suprastanza cumünela illa tschanteda dals 21 favrer 2018 decis da scriber oura las lavuors aunch'üna vouta. Il motiv per quista decisiun d'eira, cha tenor las offertas cuostava il proget memma bger (fr. 722'000.-). Zieva avoir publicho las lavuors la segunda vouta cun termin finel dals 05 marz 2018 sun gnieu inoltro darcho diversas offertas. Il proceder per inoltrer las offertas d'eira a maun liber. La suprastanza cumünela ho pudieu piglier cungnuschentscha da quellas e ho constatato cha quellas sun sün ün liviel adatto e tenor il plan d'investiziuns da l'an 2018. Cotres decida la suprastanza cumünela unanim dad ir cul import da fr. 560'000.00 davaunt la radunanza cumünela.

Lavuors proget Bos-chetta Plauna

Zieva avoir scrit oura la prüma vouta las lavuors per il proget Bos-chetta Plauna ho la suprastanza cumünela illa tschanteda dals 21 favrer 2018 decis da scriber oura las lavuors aunch'üna vouta. Il motiv eir per quista decisiun d'eira, cha tenor las offertas cuostava il proget memma bger (fr. 495'000.-). Zieva avoir publicho las lavuors la segunda vouta cun termin finel dals 05 marz 2018 sun gnieu inoltro darcho diversas offertas. Il proceder per inoltrer las offertas d'eira a maun liber. La suprastanza cumünela ho pudieu piglier cungnuschentscha da quellas e ho constatato cha quellas sun sün ün liviel adatto e tenor il plan d'investiziuns da l'an 2018. Cotres decida la suprastanza cumünela unanim dad ir cul import da fr. 360'000.00 davaunt la radunanza cumünela.

Dumandas da contribuziun

La suprastanza cumünela ho survgnieu diversas dumandas per üna contribuziun finanzia per sustgnair evenimaints locels. La suprastanza cumünela ho fat bun tuot las dumandas da contribuziun.

Permiss da traget Swissalpine 2018

La Swissalpine fo da l'an 2018 da Samedan sur San Murezzan, Bravuogn e Tavo ün occurenza. Il traget da quist'occurenza maina sur il territori da S-chanf da la chamanna Kesch tal pass dal Sartiv e da l'otra vart dal pass da Scaletta fin tal pass dal Sartiv. La data da l'occurenza es sanda, ils 27 lügl fin il 29 lügl 2018. La dumanda da la Swissalpine es, cha la suprastanza cumünela aderischa il permiss da traget per passer sül territori da S-chanf. La suprastanza cumünela decida unanim d'aderir a quist permiss.

Recuors da survagliaunza

La suprastanza cumünela piglia cugnuschentscha da la decisun da la regenza dal chantun Grischun regard l'adöver da la lingua rumauncha. La regenza ho'l recuors da survagliaunza cunter la suprastanza cumünela refüso cumplettamaing.

S-chanf, 13 marz 2018

La suprastanza cumünela